

## UNTER DEM LAMBERTITURM

**E**rstens kummt dat anners un tweedens ..! Oostern wullen wi uns dat in Huus besünners komodig maken. Saterdag saten wi all 'n maal in Ruh bi 't Frühstück. Man denn: Notmeldung van annersiet Huus. Moder meen hör Heizung wurr kolt. Ik föhl uns, ja würrlek, warm weer wat anners. Heizungsovend naken. Oha, de sprung neet an un dat een Dag vör Oostern. De Nooddeenst anropen. En Motordeel weer kött. De Mann versöch de to kriegen, man in Coronatied up Saterdag vör Oostern an Ersatzdelen to kamen weer schienst unmögelk. Dienstag Middag sull dat Stück woll daar wesen. Saterdaga- vend weer dat heel Huus all kolt. Oostersönndagmör- gen, ieskolt. Duschen gung, warm Water weer daar. Man denn de Foten up de ieskoll Fliesen. Harrijasses, wat weren de kolt. Ik keek na buten. Sneestörm, mi wurr noch koller. Komodig Oostern? Brrrr....! Heizlüfter söken. Neet to finnen. De hett Moder seker. Oha, wat sull „de“ woll maken, se is secker al infrohren. Ik hen to kieken. Oh, wat mooi warm



harr se dat in hör Köken. In en dicken Wuldecken inwickelt up en elektrisch Heizdecken satt se tüschen twee Heizlüfters. So kunn se 't vullholen. Un wat moken wi? Ah, ik weet! Backovend an un de Dör daarvan open stellen. Dat gung. Oosterman- dag: Wi haren nett so good in Buten sitten gahn kunn, nett dat hier binnen keen Wind weer. Himmel, wo kann dat in en Huus so kolt worden? Avends legen wi denn mit Backovend an, twee Püllen, twee Decken um uns to un mit blaufrohren Nösen up 't Sofa. Naderhand full mi in: Wi haren ja ok mit Poppowärmer in d' Sitz un Heizung an mit Auto dör de Welt fahren kunn. Wo hebben wi de Tied as Kinner woll overleevt? Do haren wi doch ok keen Heizung? Brrrrr... kolt!

**CHRISTINE GÜNNEL**